

Edu Vos di partido AVP:

“Na un manera camufla ta purbando pa elimina Watty Vos su number for di e Scol di Polis”

TA pa un tempo caba na un manera sporadico, pero continuo y camufla, e Directora di Instituto Policial E.J. “Watty” Vos ta bin ta anunciando cu lo haci cambio di number n’e instituto di formacion policial aki. Cada bes ta anuncia un number diferente, pero semper lagando Watty Vos su number afo. Pa cual motibo mester asumi cu e meta real ta pa saca, na un manera camufla, e number di Watty Vos for di e Scol di Polis.

Recientemente a duna e motibonan pakico e cambio di number mester tuma lugar, poco motibo cu no tin pia pa para ‘riba corda pa tin base pa laga number di e fundador di e Scol di Polis afo. El a menciona cu pa motibo cu e scol no ta dunando of lo no duna les exclusivamente na Polis so mas, pero cu otro instancianan di e cadena hudicial tambe lo haya nan formacion n’e scol aki, pa cual motibo e number lo bay cambia pa Academia di Husticia y Seguridad di Aruba.

A wordo menciona cu banda di Cuerpo Policial Arubano, cu KIA, Kustwacht, CEA, Migracion y Cuerpo di Aduana tambe lo haya nan formacion aki. Comosifuera cu awor numa e wiel a wordo descubri.

Desde su inicio na Isaac Wagemakerstraat, Scol di Polis a bin ta duna curso y formacion no solamente na Polis, pero tambe n’e bewakernan di Huis van Bewaring Dakota, despues KIA, como tambe n’e oficialnan di Inmigracion. Cu otro palabra esaki no ta algo nobo pa cual mester bay inventa e wiel di nobo, segun Edu Vos.

Tambe a menciona cu ta dunando of ta bay duna curso n’e oficialnan tanto di Kustwacht como di CEA. Ora bo ta papia di Kustwacht t’e number di Watty

Vos ta bin den mente, pa motibo cu ta su persona t’esun cu a tuma iniciativa pa awe awanan teritorial di Caribe Hulandes tin proteccion di Kustwacht di Reino.

Mesun cos ta conta pa CEA, cual departamento ta Watty Vos a funda bou di e number di Dienst Beveiliging Aruba, conoci den boca di pueblo como “Blue Team”.

Mester ta hopi ingenuo of di mala fe pa expresa cu e vision planta den suelo di e pueblo di San Nicolas 43 aña pasa a keda chikito, pero awor (numa) ta (bai) crece. Un vision cu a crece, adapta y bay cu tempo durante 43 aña y cu a laga tur esnan cu a bringa Watty Vos cu alma y cuerpo cu hopi gana di wak e Scol di Polis fracasa.

Cu e edificio actual na Fort Heuvelstraat a bira chikito p’e cantidad di alumno y diferente curso cu ta wordo duna, ta prueba palpable cu e vision di Watty Vos tin derecho di existencia.

Como tal su number mester keda den cual variante cu por pensa di pone na lugar di e scol mirando cu su base, su raiz ta esun traha, planta riba 16 di augustus 1975 den suelo di e pueblo di San Nicolas.

Cu otro palabra number di Watty Vos hamas por wordo kita como tambe sali bay busca tereno den pueblo di San Nicolas mes, mirando cu t’ey t’e cas di Scol di Polis. Nada di bay busca lugar otro parti di Aruba pa construi un edificio nobo pa Instituto Policial E.J. “Watty” Vos.

Si acaso ta sigui insisti pa laga elimina Watty Vos su number for di Scol di Polis, cu e (mal)hecho aki ta habriendo un porta pa den futuro cualkier Gobierno, politico of ambtenaar por laga kita na su antoho nombrenan di yiunan di tera for di caya, edificio, instancia, scol, parke,



plaza of stadionnan.

Un tendencia hopi peligroso mes pa motibo cu bo ta secuestrando e reconocimiento n’e logronan di e yiunan di tera aki. Un porta cu dificilmente lo por wordo cera pa motibo cu e eliminacion di e number Watty Vos for di e Scol di Polis lo marca e precedente di esaki, segun Edu Vos.

Mare e por ta robes den esaki, pero analisando e motibonan fofu duna pa cambia number di Instituto Policial E.J. “Watty” Vos pa Academia di Husticia y Seguridad di Aruba, lo e no keda straña cu despues lo anuncia cu ta cambia e fecha 16 di augustus como Dia di Polis di Aruba mirando cu e fecha di e celebracion aki ta danki cu riba e fecha aki 43 aña pasa Watty Vos a inaugura Scol di Polis contra biento y marea.

Cual fecha di celebracion tabata un escogencia di Alto Mando Policial net despues di nos Status Aparte. Practicamente despues di nos himno y bandera e Scol di Polis ta un simbolo di nos autonomia, mirando cu el a wordo realisa casi 11 aña prome cu nos Status Aparte, pa motibo cu e ponencia di e tempo ey tabata cu e formacion policial mester keda central na Corsou. Un bes mas mare e por ta robes den esaki.

Si e cambio di number sin e number di Watty Vos aden continua, e proximo Gabinete di AVP Watty Vos su number lo wordo restaura n’e instituto di formacion di husticia y seguridad aki, Edu Vos a garantisa.